

衡

華

館

詩

錄

序

詩緣情而作也夫人必有不能已之情然後有可以傳之詩而世乃分唐別宋尊杜墓韓斤斤然矜體派標品格自以爲工舛矣抑亦隘矣紫詮先生富於學卓於識逸於才著作等身不以詩名而觸事感情擘箋揮毫百篇立就或莊或俳忽正忽奇時而陵紙怪發時而絃外音流脫盡町畦自成杼柚先生之言曰予不知其爲詩也祇自寫其情之不容已焉耳嗚呼此所爲不必以詩名而詩卒不可及且可歷久彌傳也去歲遠游東瀛與其國之文人學士交酬唱甚多懼日久稿或散失遂取生平諸作彙成一集付諸手民凡友人贈和者亦並附焉蓋以見文字之交一往情深而纏綿之致欵洽之誠流露於不自知卽千百載後展卷低徊昭然若揭也且夫

惟有餘於情之外者乃有味乎詩之中古之人矢口謳歌豈
預計流傳於後世而以情感情遂不得不推爲絕調則知詩
無工拙以有真性靈真情韻爲工拙或謂先生遭讒晦迹抑
鬱無聊以詩自遣方今朝廷求賢若渴將有人焉力爲推轂
俾得奮於天衢施於當世元微之曰雕蟲小技壯夫不爲此
集之成非先生性所安也噫果若所云則情滯於境而移於
物矣以是言情其情必僞以是爲詩其詩可知偉少爲飢所
驅稟承庭訓不敢耽於韻語以快有用之光陰此中甘苦旨
趣悉屬茫然顧見世之以門戶判詩以典籍填詩甚或以剽
竊險隘敷衍其詩心竊愧之光緒紀元之歲獲交於先生由
是以道義相切劘數年如一日故知之獨詳因泐數言俾贗
先生詩者知其梗概焉庚辰端午愚弟番禺洪士偉拜序

自序

余不能詩而詩亦不盡與古合正惟不與古合而我之性情乃足以自見余足不出里巷目不覩邱墳所與交接者又絕少當世通人名士方弇鄙自愧何敢言詩不惟不敢更何足以知詩然竊見今之所爲詩人矣揅擷以爲富刻畫以爲工宗唐祧宋以爲高摹杜範韓以爲能而於己之性情無有也是則雖多奚爲慨自雅頌降爲古風古風淪爲律體時代旣殊人才亦變自漢魏六朝迄乎唐宋元明以詩名者殆不下數千家後之學者難乎繼矣詩至今日殆可不作然自有所爲我之詩者足以寫懷抱言閱歷平生鬚眉顯顯如在同此風雲月露草木山川而有一己之神明入乎其中則自異矣原不必別創一格號稱初祖然後翹然殊於衆也余自少讀

詩自古作者以逮 本朝諸大家皆欲討流泝源窮其旨趣
久之益知作詩之難及長雖有所作未敢持以問世惟顧滌
齋明經師楊醒道茂才稍稍見之以爲可存竊嘗謂所貴乎
詩者與苟同甯立異必自淺之深由麤而精歷觀古人作亦
有不盡佳要其研精殫力積數年十年而後成自有一家面
目在夫豈徒以絺章飾句爲事哉性情之用真而學問亦寓
乎其中然後始可與言詩矣余今年二十有二歲積詩凡數
百首要不盡可存但願質諸天下後世之能詩者以共相印
證可也道光二十九年己酉夏四月下旬蘅華館主識於甫
里行素園之南窓

張園老民自傳

老民姓王氏素居蘇州城外長洲之甫里村卽唐陸天隨所隱處也老民以道光八年十月四日生初名利賓十八歲以第一入縣學督學使者爲秦中張筱坡侍郎稱老民文有奇氣旋易名瀚字懶今遭難後避粵乃更名韜字仲發一字子潛自號天南遜叟五十後又曰張園老民老民世系本出崑山王氏有明時巨族也族中多有位於朝明末兵事起吾家閩門殉國雖始祖必憲甫在垂髫逸出存一線自此至晉侯貽孫載鸞居崑凡四世竝讀書習儒業有聲庠序間載鸞諱鵬翀品端學博尤爲士林所推重以早世子尙幼戚串中有覬覦者乃遷甫里大父諱科進字敬齋習端木術篤厚慎默見義勇赴鄉里稱善人父諱昌桂字肯堂一字雲亭著籍學

官邃於經學九歲盡十三經背誦如流有神童之譽家貧刻苦自勵教授生徒足跡不入城市老民上有三兄十日間俱以痘殤禱於武林遂生老民老民幼時屢夢浮屠佛像魂自能從泥丸宮出入十餘歲後始止自少性情曠逸不樂仕進尤不喜帖括雖勉爲之亦豪放不中繩墨既孤家益落以衣食計不得已橐筆滬上時西人久通市我國文士漸與往還老民欲窺其象緯輿圖諸學遂往適館授書焉顧荏苒至一十有三年則非其志也滬上雖爲全吳盡境而當南北要衝四方冠蓋往來無虛日名流碩彥接跡來遊老民俱與之修士相見禮投縞贈紵無不以國士目之中如姚梅伯張嘯山周弢甫龔孝拱其交尤密西館中時則有海甯李壬叔寶山蔣劍人江甯管小異華亭郭友松並負才名皆與老民爲莫

逆交惟是時事日艱寇氛益迫老民蒿目傷心無可下手每
酒酣耳熱抵掌雄談往往聲震四壁或慷慨激昂泣數行下
不知者笑爲狂生弗顧也金陵旣陷爲賊窟而滬上亦以閩
粵會匪起戕官據城老民思出奇計以復之卒不能發憤抑
鬱患咯血疾幾殆咸豐八年徐君青中丞開府吳中與老民
固有文字之契老民以和我防海弭盜三大端進言前後上
書十數通皆蒙優答十年金陵大營潰賊竄吾吳常鎮蘇太
同時俱陷東南半壁至此糜爛四郡村鄉亦蹂躪無完土老
民於是志愈孤心彌苦方捧上官檄督辦諸鄉團練老民知
其貪詐畏怯萬不可恃屢上書當事代畫方略言過切直當
事外優異而內忌嫉之顧所言頗見施行多能見効其最要
者以西人爲領隊官教授火器名曰洋鎗隊後行之益廣卒

以此收復江南然用其言而仍棄其人并欲從而中傷之此
老民之所以扼腕太息痛哭流涕長往而不顧者也維時賊
於蘇鄉遍設僞官立董事皆土著人暴斂橫征僞卡林立老
民固素識諸董事密相結納說以反正言曾帥善用兵祇以
方剿上游未遑兼顧今安慶已復援軍旦夕必至不可不自
爲計因激以忠義勉以功名令諸董事入賊中說頭目結內
應皆有成說其黠者亦從而徘徊觀望老民密縱反間使賊
黨互相猜貳自煎羽翼諸內應者多急欲見功勢頗可乘而
當事者遽以通賊疑老民禍且不測聞者氣沮老民急還滬
上猶思面爲折辨顧久之事卒不得已航海至粵旅居
香海自此毆門削跡壹意治經著有毛詩集釋專主毛氏後
見陳碩甫毛氏傳胡墨莊毛詩後箋遂廢不作同治二三年

聞李宮保方次第克復吳中郡縣老民代粵人某上書宮保
陳善後事宜并言諏遠情師長技自致富強之術頗蒙采納
六年冬西儒理君雅各招往泰西佐譯經籍遂得遍遊域外
諸國覽其山川之詭異察其民俗之醇漓識其國勢之盛衰
稔其兵力之強弱道經法都得瞻其宮室之壯麗士女之便
娟塵市之駢闐財物之殷阜與英之倫敦並峙稱雄同爲歐
洲巨擘焉旣至英土居蘇格蘭之西境其地近北極少燠而
多寒春夏之交徹夜有光而山水清淑巖壑秀美遊展所至
殊足娛情適志九年二月還粵此三年中老民以孤身往還
數萬里嘗登舩樓以眺望決目極天蕩胸無際波濤消其壯
志風雨破其奇懷未嘗不感愴身世悲憫天人擊碎唾壺淚
泔泔墮也老民旣還自泰西當事頗有知其寃者或貽書勸

其出山或欲託人招致幕下老民俱謝不往豐順丁公一代
偉人也尤賞識老民謂當今通達時務熟稔外情莫若老民
爲之揄揚於南北諸大僚於是諸大僚始稍稍知有老民者
嗚呼此老民生平第一知己也老民固極思感激馳驅以報
知己而憂患以來精氣消亡才華零腐既不能上馬殺賊下
馬草檄又不能雕琢文字刻畫金石以稱頌功德徒爲 聖
朝之棄物盛世之廢民而已辛未秋普法戰事起七閱月而
後定老民綜其前後事實作普法戰紀是書雖僅載二國之
事而他國之合縱締交情僞變幻無不畢具於是談泰西掌
故者可以此爲鑑惟倉卒秉筆或患冗蕪尙有待於異日之
重輯而老民自知其必傳於後無疑已癸酉香海諸同人醵
貲設印局朔行日報延老民總司厥事老民著述乃得次第

排印光緒五年己卯老民作東瀛之游藉以養宿疴滌煩慮
取道滬濱放櫂金閶得重見故鄉風景濶別二十年矣真覺
城郭則是人民則非有丁令威化鶴歸來情況及身而重閱
滄桑生還粉梓固老民初念所未及料者也既至日東遍歷
崎陽神戶浪華西京諸名勝居江戶者十旬遍交其賢士大
夫一時執贄請受業者戶外屢滿壺觴之會壇坫之開無日
無之唱和諸作頗有豪氣中又爲日光山之游遍覽諸瀑布
窮其幽邃老民將歸日之賢士大夫餞別於中村酒樓星使
參贊以下至者百有餘人日人謂自開國數千年來所未有
也老民久居粵東意鬱鬱不歡恒思歸耕故鄉卜居於莫釐
鄧尉之間築三椽之屋拓五畝之園藏書數萬卷買田一二
頃徜徉誦讀其中優游卒歲以沒吾齒願是願卒未能遂豈
筌華館詩餘圖說畧老民自傳

非天耶嗚呼老民雖流徙遐裔僻處菰蘆而睠懷家國未嘗
一日忘嘗言此十數年中時局一變髮檢回苗悉數蕩平左
帥用兵新疆擴地數萬里功震寰中威行徼外赫然見中興
盛烈然而泰西大小諸邦叩關互市輒以兵力佐其商力所
至各埠設官置戍櫟幢相望每挾其所長從而凌侮我求必
應請必遂一旦齟齬環而伺我者數十國腹心肘腋間遍布
森列幾於國不可爲國矣嗟乎此蓋誤於羈縻之說而駕馭
未得其宜也近者日併琉球俄據伊犁我國家並持節往問
而時虞失和勢且岌岌老民外感於時勢之艱難內憤於措
施之顛倒舊疾陡發誠使祈死得死亦復何憾老民有弟曰
利貞字叔亨一字諮卿讀書未成名而卒年僅二十有七有
姊曰嫫字伯芬嫁吳村周氏癸酉六月先老民而逝老民妻

楊氏夢蘅名保艾字臺芳娶僅四年沒於滬續娶林氏名琳字懷蘅一字冷冷經歷患難中與老民同甘苦老民無子有女二長曰婉字茗仙歸吳興茂才錢徵早殞次曰嫻字樺仙生不能言嗚呼老民既無子矣而復奪其女不解造物者所以待之抑何刻酷至斯哉自始祖必憲至今二百四十餘年七葉相承五代單傳僅得男子十有五人老民以下有從姪三人相繼夭沒於是自明以來巍然碩果僅存老民一人而已天之所廢雖能興之天不獨厄老民而或將并以毒王氏也恐王氏一線之延至老民而斬矣噫嘻不大可痛歟尤可異者曾王父娶於沙氏大父娶於李氏父娶於朱氏其家並無後老民弟娶於夏氏髫髻俱亡老民先娶於楊氏危乎不絕如縷繼娶於林氏亦已不祀祖姑嫁於汪伯姑嫁於曹宗

祔竝絕老民族黨無存密親蓋寡側身天地形影相弔豈天
之生是使獨歟老民每一念及未嘗不拔劍斫地呵壁問天
也老民少承庭訓自九歲迄成童畢讀羣經旁涉諸史雜說
無不該貫一生學業悉基於此自後奔走四方無暇潛心默
識矣父在未嘗盡一日養奉母居滬上扁舟道路甘旨缺如
而母氏絕無不豫色但勗以忠義節廉而已老民母固知書
識大體四五歲時字義都由母氏口授夏夜納涼率爲述古
人節烈事老民聽至艱苦處輒哭失聲因是八九歲卽通說
部吳門旣亂母氏憂形夢寐逮老民邁罹奇禍母氏竟以憂
殞其生老民以此積慘終身痛欲剗心贖難糜體雖仍偷息
人世不可復爲人矣老民於詩文無所師承喜卽爲之下筆
輒不能自休生平未嘗屬藁恒揮毫對客滂沛千言忌者或

嘗其出之太易至於身遭讒謗目擊亂離懷古傷今憂離弔
逝往往歌哭無端悲愉易狀天下傷心人別有懷抱也老民
邇來潦倒頽唐百事俱廢去冬咯血至今未愈日在藥爐火
邊作生活深懼一旦溘然平生著述必爲人拉雜摧燒因先
將詩錄八卷檢付手民其餘藏於行篋者尙多不足供餽
覆既因病得閒聊自料理所著有春秋左氏傳集釋六十卷
春秋朔閏考三卷春秋日食辨正一卷 皇清經解札記二
十四卷瀛壖雜志六卷普法戰紀十四卷四溟補乘三十六
卷法志八卷俄志八卷美志八卷西事凡十六卷甕牖餘談
十二卷火器說略三卷乘桴漫記一卷扶桑游記三卷海陬
治遊錄七卷花國劇談二卷老鑿鑿語十六卷遜窟讞言十
二卷弢園文錄八卷蘅華館詩錄八卷弢園尺牘十二卷都

二十有二種生而作傳非古也老民蓋懼沒世無聞特自叙梗概如此光緒六年夏五月下旬弢園老民識於天南遯窟

詩評

采采流水蓬蓬遠春仙才妙筆由於天授七古尤見才氣豪邁橫掃千人蓋作者胎息於韓杜探源於風騷汎濫於溫李元白融會而貫通神明而變化之青邱秋筮之間何難別樹一幟壬子夏荷月朔日華亭弟張鴻卓讀於滬城客邸并識清新流宕雅近靈芬加以麗藻可躡溫李堂奧今人不必不如古人於吾弟益信天下才一石吾弟畧盡之僕亦磊落自負固不僅於長短句中討生活也雙鬢星星一無所就言之慨然近於此事亦不大作矣弟詩必成名家僕將來或附吾弟以傳則幸甚壬子首夏七日新陽碩惺滌蘆氏識

讀言情諸什綺麗纏綿具見錦心繡腸玉溪生不得專美於前矣壬子仲夏十一日海甯李善蘭讀畢謹識

詞鮮月露思入風雲精銳走雷霆聰明淨冰雪其才固是不
凡壬子六月朔日華亭雷葆廉拜讀一過於海上詩巢燈唇
并識數語以示欽佩

大箸清靈婉約深得靈芬神髓惟靈芬於宋人乞靈尊作於
晚唐入手樹骨實勝鏤而不已何難駕靈芬而上之甲寅孟
夏再讀一過於西人仙樓居寶山蔣敦復拜讀

意境超脫吐屬韶秀非絕世才華那能臻此江甯管嗣復讀
竟識識

鉅稿淡冶秀蒨大有中唐人意境七古氣骨雄健思力沈著
尤不易及餘姚弟周白山讀後謹識

古詩俊逸近體秀麗其中精練處直欲頡頏晚唐所謂筆墨
之外自具性情吟咏之餘別深懷抱吾聞甫里遠山葱蒨綠

水迴環魯望而後必有才人於此益信時庚申重九小窓獨坐風雨淒然再讀一過書以志喜邵陽魏彥拜識

霍去病不好陣法岳鄂王惟事野戰仲弼詩境竊謂似之然有時長槍大戟中而仍復細鍼密縷則賢者固示人以不可測也湘鄉左樞讀過謹志

仲弼於學無所不通於詩亦無體不工五律多深穩七律多清秀五古兼參選體七古縱橫跌宕是辨香於杜陵老者每讀一過輒爲擊節上元澄之弟孫文川拜讀并識

集中諸體皆工清麗芊綿似溫李排奐奇崛似杜韓至於激昂慷慨悲壯淋漓則又詩中之豪也才大如海固自無所不有陽湖沐蠡弟吳新銘拜讀并識

少作綺麗纏綿自是才人本色至於身經患難目擊亂離則

哀思愁音全溢而出其蓄之也有素則發之也有自杜陵詩
史夫何間然讀竟攝具三拜陽湖弟周弢甫鵬虎讀畢謹識
清麗似金荃豪放似玉局憂國傷時悲涼感慨則似杜陵仲
弢詩境無所不包此謂健者秀水弟次公孫融讀後謹識
詞多偏宕孔文舉意主悲涼庾子山此郭靈芬句也請移以
評仲弢之詩秀水弟子辛伯源拜讀并識

清麗芊綿渾雄卓犖兼而有之一時作者惟江東老劍可與
抗衡旅窓夜雨挑燈讀之頓忘客居之感集中少作已自出
人頭地敢請出示全詩以豁眼界庚申三月上旬陽湖管貽
芳讀一過謹識

飛文揚藻采絢葩流自是君身有仙骨世人那得知其故光
緒元年四月朔日侯官林昌彝讀一過并識

統觀全集以靈慧之思運邁往之氣於亂頭羸服中見天姿國色始取徑于靈芬上追坡谷而秀韻則出唐人至窮愁亂離更遭奇禍境愈苦筆愈蒼則杜陵之憂傷柳州之怨艾合而爲一沈鬱頓挫卓然名家光緒五年冬十月望日吳縣楊引傳讀過并識

越南黎調頓首敬啟紫詮先生閣下猥枉文旌兼頒雅籀感荷之私不可言狀承示滬上感事四詩迴環雒誦如挹清芬諸作詞句雄渾情志憤激筆下有若飄風急雨之颯至而一腔憂時愛國之心懇款殷拳溢於言表益令人嘆息弗置夫春鳥秋蟲物候之感乎詩者也山風海月境地之宜乎詩者也惟有心人能一一以神明入乎其中發爲歌章芬芳悱惻迥異尋常嗚呼人生於世才與遇乘則叱咤風雲刻畫金石

贊襄郅治鼓吹休明以先生當之夫豈異人任哉先生器識宏深才猷遠裕經濟之學抗古超今即使聯翩直上揚世德而掇巍科亦意中事耳何乃鴻冥蟬蛻物外天全豐於才而審於遇蓋未有如先生者也以先生之才曾不見用於世未知造物者是誠何心豈天以厄之者成之歟抑蚍蜉而豹藏深潛高蹈而不爲世網所櫻歟此非鄙人思擬之所能及也調恭承簡命有香海之行自來三年於茲南關五雲鈞韶在夢簡書是凜夙夜慙惶懼職守之難循歎世途之多巖逆旅寒燈蓋有不勝嗚咽者忽得是詩不覺胸中棖觸感慨繫之惟是一行作吏此事遂廢案牘倏筆研荒蕪搔首撚髭苦不成嘲古人有云覓句天應悶狂搜海亦枯其調之謂乎不揣弁陋奉次元韻以博大方一笑三春行盡轉醞輕寒伏祈

慎護眠餐爲道自重

越南潘炳頓首拜手奉書紫詮廣文先生閣下炳銜命出使
兩臨百粵今春猶小駐於香海韶光易邁芳序扇和花晨竹
候喟然有浴沂風雩之思適蒙惠以佳筆奉揚之下如挹仁
風對使拜登感荷無量使者既退臨窻清坐朗誦所書四詩
初不知爲何如也三復之餘風調道逸意興清微如錦繡纂
組相鮮以爲色宮商角羽互合以成聲不覺令人心脾俱爽
古人有言曰詩以窮而後工是作也歌離弔夢而憫世思君
之心溢乎言表以視楚臣出塞漢妾辭宮諸作其悲涼激楚
尤爲過之是豈不窮不足以見先生之工哉夫傳巖版築顏
巷簞瓢聖賢韻事獨有千古如先生者可以希之矣先生博
物洽聞富有經濟當代名公鉅卿皆稱之爲未易才洵知人

也洵知言也先生勉乎哉勉而思之必有所合行將受知於
世黼黻朝猷贊襄戎幕而利澤及於人聲名垂於後堯舜君
臣事業胥自此矣輒不自量續貂奉正此外惟萬萬自愛

贈詩

閔仲弢詩率成五十八字

新陽嶺 惺滌齋

不負狂名卽酒名劉又僻誕似先生海天涼月愁無際吳苑
秋風客獨行落魄十年還劍氣抗歌中夜裂琴聲賀回李白
從來少敢說吾詩老更成

贈蘅華館主

崑山孫耿渠笠舫

高才夙懸欲疑年傾倒明珠錦瑟篇鄉里無多憐我在名山
有待附君傳自慙放逐爲遷客坐對清新想謫仙珍重今時
留息壤也應早蓄買山錢

相逢行贈沐蠡仲弢

江甯何 詠梅屋

塵海喧闐無可語斗大城中吾與汝邇來人事多侘傺况復
十日九風雨消愁君就杜家康論戰我思越處女有時拔劍

斫地歌天壤王郎定相許王郎知名已十年賣文海上囊無錢不似張騫心鑿空但憑驕衍口談天酒酣狂叫尋吳質醉倒便藉華陰眠袖中奇句輒心賞豈獨神交寶劍篇人生幾得團沙會是處相逢可傾蓋濯纓何必覓滄浪把袂未妨邀駟僧行脚無端墮霧中舉頭徑欲游天外水仙不奏海山絃萬竅一聲鳴地籟

調仲弢

江甯何 詠梅屋

王郎三十好青春家在吳東住滬濱大隱愛招三島客小文神似六朝人崑山片玉休論價滄海遺珠豈合貧我亦江湖來泛宅願傾十萬買比鄰

謹呈子潛先生四律

嶺南蘭亭舊酒徒

之子清華擅相逢在海濱萍隨風所適葵願日常親素志稱

奇士雄心付逸民論交千里外遮莫有前因

忠憤寸衷縈他鄉念帝京中原嗟逐鹿率土孰封鯨駿業

思憑軾鴻才欲請纓摠懷篇什富詩句羨長城

亂世才多屈滄江寄此身龍雖潛勿用螻詎屈難伸詞賦儕
班馬遭逢異渭莘玉成天意在豈遂老風塵

大造無寒歲焉知松柏心風濤堅晚節身世托知音著述千
秋重艱難十載深道腴堪自樂安用問升沉

贈天南遯叟

淞濱老圃楊引傳

鑄成此錯復奚言聊復潛踪似避喧大海應成水仙操夜郎
難白李生冤等身文字工新製滿目蓬蒿憶故園未卜一燈
重聚首秋蟲切切語空繁

長歌五百字奉贈紫詮妹丈吳縣楊引傳醒甫

少文山水遊向平婚嫁事百願具未了俄已成衰邁初夏草木榮欣欣盡生意古梅丈人行無復好風致飄蓬離本根同岑忽殊地寄我一封書相贈多珍異皎皎明鏡心惓惓盍簪誼文采更斑斕羅巾與香袂其物旣瑰奇其情彌懇摯女子將有行云爲添篋笥展觸舊時懷言之輒歔歔我妹昔事君自慙百不備我婦出妝奩一一代籌計荆布稍光華坐待香車至絳帳舊生涯青箱故門第與君爲親串來往無猜忌維時各少年議論爭意氣青雲當致身自命廟廊器人事竟乖忤百憂催老大妹旣早夭折我婦亦憔悴世亂起干戈投淵竟珠碎罡風一夕來纓芳怨凋墜杜鵑枝上紅滴作眼中淚彈指二十年何事不堪喟君女早長成已得乘龍壻我女雖穉弱送之將結悅溯其垂髫時各已失所恃慘淡白楊風不

驚花姊妹偷生我與君已近知非歲懊惱百無成盈頭生雪
刺君尤遘奇禍幾爲虎口餌脫身東入海快哉拓眼界遠窮
二萬里不數張騫使異域雖云好豈得久留滯歸居粵海濱
冠裳雖椎髻年年有書來自述不得志瘴土秋尙炎頑山春
不翠文士况寥寂不得佳釀醉坐此起鄉心和鴈落天外故
園竹樹蕪先塚松楸敗一二舊知交不死亦已艾何時得相
見登堂重設拜惆悵望南雲何以遙相慰勸君作達觀胸中
洗滌芥著作旣可傳精神亦宜愛當其鬱結時長歌聊取快
疎狂獲罪戾天心終必悔金雞下夜郎戚屬重歡會更製黃
絹詞引取外孫戲競折忘憂花獻與老人戴

感遇言情五言詩四十韻寄呈紫詮外舅先生

烏程錢 徵昕伯

舊夢長洲苑新居錦石巖
虞翻惟自恨賈誼只傷鰭
燕鶴生先異麒麟早不凡
何曾才是累未免病于詘
器許經盤錯心寧畏險巇
雄文掣繡虎健筆邁驚鵬
陸海初傳箭長星仰見
機無聲天墮狗有力地生
應大局先甌缺孤城復鼓
僂開張元武陣浩蕩白龍
縵玉帳方論術金人偶失
絨營蠅俱止棘射雉孰爲
巖挺走無殊鹿狂奔有類
鼃石梁浮遠遠銅柱轟
嶼嶼市隱春堪賃炊虛釜
不黠高歌惟洞鑿異味得
毛蜆事竟同張儉人誰有
李嚴回看曾甌破不語爲
碑銜海運從魚徙天空任
鳥鵲長途七萬里托命一
孤帆顧影笑如蠋逢人態
似慙乾坤容噓傲世界更
嶄嵌盡日仍彈缺嬉春或
舞杓思歸魂黯黯執別手
慘慘下士邛和駟嘉姻玉
比城元珠遭棄置散木謝
雕剗落雙蓬鬢粗疎一老
饒翻將鸞鵲許

效燕喃喃雅誼惟當佩魚書定幾函論文殊沆瀣味道敢酸
緘柳舞須鶯喚花嬌仗蝶攪何時承馨欬與訪舊松杉埽徑
延三益誅茅築一影青甍王氏物白柄杜家饒杞菊前身賦
芙蓉隱士衫生涯歸筆墨世網墮杯棖鉢擊從催句樽開肯
立監煩襟千疊嶢往事一叢芟息壤盟斯在明神鑒至誠令
修其共勉底用問巫咸

紫詮先生寄示近作卻寄

新甯余堯壽雲眉

新詩讀罷望南州太息騷人百事憂鳥爲驚弓勞遠翮魚從
脫網泄中流功名已屬雲隨眼鬢髮何堪雪滿頭翹首秦鞭
應早返繞朝心緒重山邱

時江南臨局諸君
議招先生同罷

走遍天涯不見人

用陳一山
比部句

交遊到處氣嶙峋悲君絕域孤

淚愧我頻年獨客身賈誼有才空抱負馬周末遇困風塵

英雄落拓非無賴肝膽猶將古道親

讀諸詩後寄呈一律卽步集中頻年原韻

番禺李光璇星衡

蠻觸山川事日非可堪嗷雁半流離
長城信有蒼生託遜窟宜酬故國知
莫漫酖人猜叔子端防軼我過西師
瀛壖指顧圖方略赤手安瀾在轉危

奉贈仲弢先生

古端州羅兆庚蓉洲

久仰星鳳甚渴饑龍門今日得瞻依
胸懸金鑑由天授筆捲銀河作雨飛
入世肝腸成木石對人談笑盡珠璣
蓮花幕內朋多少才學如君我見稀

偶成四律奉贈兼以留別

滿洲延譽桂山

生花一管絕塵埃海內羣驚未易才
蓋世經綸偏不遇憂時

懷抱幾曾開高吟白雪今無曲浪說黃金舊有臺
逖跡天南絲底事美人香草鎮堪哀

斯人未合老巖阿經濟文章兩不磨幾見浮雲遮日月從知
平地有風波性因能定窮愁慣才到稱奇坎珂多古道行行
誰共語豈長空唱飯牛歌

英雄失路復誰憐絕域西來別有天遠謫夜郎唐李白親逢
織女漢張騫九歌鬼向山中泣一笑人從海外還贏得雞林
聲價重梯航爭蓄買詩錢

鍊金端勝買新絲合鑄揚州杜牧之顧我獨醒邀我醉別君
太速識君遲淒清風雨書應達迢遞關山夢有知擊碎唾壺
涼夜永碧天如水易相思

奉贈紫詮廣文二律

萍鄉文星瑞樹臣

去國曾輕萬里游感時翻抱百年憂苦將清議持危局暫把
空言當運籌同甫文章傳異域魯連意氣動諸侯蒼苔自是
千金品憑仗何人藥籠收

自信生平第一流逢君今日合低頭名山事業爭千古滄海
襟期隘九州敢屈軍諮王景略豈徒書記阮陳留古來材大
難爲用會見明廷側席求

奉贈紫詮廣文卽以留別

越南陳希曾望沂

生平少年日井蛙何太拘不憚天海隔一爲長風遊白雲石
嵯峨珠江水淪流烟霞合靈鬱霄漢撐羅浮趙臺與劉闕千
古餘山邱勝引得王子鶴爽今寡仇遯跡天南窟竹素相優
游著書有戰紀精微獨旁搜詞鋒撼五嶺筆力傾全歐風會
如轉丸列國爲春秋縱橫數萬言前箸無遺繹馮煖歎長鋏

季子傷敝裘君才亦二子富貴非所求
問君似君志當爲天下憂胡乃處林壑
孑然一身謀君言堯舜世下亦有巢由人
生各有命馳逐竊所羞鯢鵬潛北溟蘭芷生芳洲
燕雀豈相識蕭艾非其儔涵泓學子富卓犖才子優
坎軻遇子困落拓境子幽雖然又何怨雖然又何尤
不朽有盛事佳人惟信修愧我樗櫟材佐國無鴻猷
中外界天塹東南風馬牛荊州此一挹親見五鳳樓
殷勤接軟語繡段將何酬須臾惜分手臨風懷去留
各勉日新志聲氣永相投寒潮湧素月天路長悠悠

讀紫詮廣文大箸寄呈

汀州賴其勦慧生

君不見海上騎鯨七萬里蛟宮蜃窟等遊戲足跡能令遍地球
方稱世間奇男子又不見少年讀破萬卷書俯仰流俗留

眞吾古人不作誰知己任教呼牛呼馬呼狂奴文章浩蕩驚
海國壯志顛連困磨蝎此生本爲著書來底事當年輕投筆
香海波濤一港幽片帆無恙且勾留寄語江東諸父老耻作
溫嶠第二流先生醉後歌代哭飄泊天涯愁畫粥羶牖猶得
記餘譚麝煤光炮三更燭先生醒來哭當歌捃摭文字罪東
坡莊馱胥是闌言耳畸人寄託訛傳訛嗚呼有才不遇竟如
此薦禍難得孔文舉天之報施非無情厄君之遇彰君名君
不見武陽侯程將軍灌夫視之不值錢一文

賦呈紫詮先生用感事詩原韻 越南潘炳九霞

關山難越道途脩海上乘槎暫此留欲寄隴梅疏驛信怕聽
窓竹戰宵秋登樓幾度空懷古索句何人獨遣愁莫道乾坤
正多事四方已慶甲兵休

越王臺畔暮雲昏無際波濤湧海門已見囊錐騰寶氣誰將
匣劍拭塵痕江湖不棄謀臣略

君上當事者
多見施行

草莽常懷聖

主恩憂患須知天意厚玉成利器辨盤根

惆悵風流往事空人生遇合聽蒼穹定知湖海多雲雁不遠
關山滯雪鴻大地環觀馳域外歐洲變局貯胸中歸來重補
衡茅集何日東山起謝公

閒寫黃庭一二篇端居多暇意欣然未應肥遯娛風月定有
元音寄管絃賈誼栖遲傷往日馮唐遇合是何年草廬未出
紆籌畫憂樂知爲天下先

賦呈張園先生

嶺南王 騫月槎

詞壇樹幟獨超倫海內羣欽學識真構思風雲窮變態揮毫
花草門精神登龍自昔稱佳士造鳳於今識可人章句尋常

何足道知君景畧是前身

露白葭蒼寄夙思清輝咫尺隔天涯
葵忱獨抱三秋感荆範徒嗟半面遇
詩思每隨潮信長琴心只許夜燈知
近來時事關懷甚幾度携樽欲問疑

奉贈紫詮先生七律四首 古猷州吳廣霖瀚濤

十年飄泊遯南翁跋扈飛揚意態雄
白也世人皆欲殺鳳兮吾道豈終窮
難消斫地悲歌氣儘有登樓作賦風
恰恨生才才不用由來多事是蒼穹

一卷新詩集衆芬高樓風雨感君文
名山早擅千秋業健筆能開萬里雲
本自多情同白傅那堪蠻語學參軍
飛鴻避彈翔寥廓不管人間燕雀羣

碧海茫茫萬古流興來遙泛日邊舟
閒尋晷蓋風流跡且結

盧敖汗漫遊姓氏俄驚蓬島徧鶯花都付錦囊收少微此夜
生芒角百丈文光犯斗牛

愧我同爲東海客卑官抗俗走塵埃狂奴久已櫻時忌笑口
何期爲子開白璧青蠅甯足浼美人醇酒亦堪哀敬亭山色
珠江月落落寰中兩霸才

七古一篇奉贈天南遯叟

嘉應廖錫恩樞仙

神山雲氣滃而深神山芳樹鬱森森雲欲暮兮春在樹倍思
空谷之足音我住神山已三月舊雨不來今雨歇俄傳門外
客星臨天南遯叟前通謁遯叟舊是吳中豪樹幟騷壇意氣
高一朝被謗遯南服看花飲酒快遊遨遊遨到處人爭識七
萬餘里經西極蓬萊神仙把手招挂帆又指扶桑國船至神
山十日留西都名勝甲靖洲真山真水真圖畫付與才人筆

底收昔讀君詩感君遇今日逢君爲君新立身須自定千秋
那管旁人來毀譽志存忠孝報君親不在爲官在爲人德行
本根文藝末高曾矩矱師先民刻楮雕蟲徒小技風雲月露
詞何靡君才實大出緒餘愛國憂時是詩史杜老浣花陸劍
南天南遯叟鼎而三他時刻就東游集寄與神山俗吏探
賦呈紫詮先生

日本龜谷行省軒

雄心欲著祖生鞭遊徧歐洲路八千慷慨談兵辛棄疾風流
耽酒杜樊川世無知己堪惆悵天付斯才豈偶然新史好藏
東海外芙蓉峰聳鬱雲烟

卽席贈幾園先生

日本川田剛甕江

漫遊乘興上輪船來泊扶桑日出邊著述等身人未老風塵
遯跡骨將仙豈求靈藥入三島欲訪逸書存百篇莫怪相逢

傾蓋久令譽夙自藝林傳

奉贈張園先生卽和魏江韻 嘉應黃遵憲公度

神山風不引迴船且喜浮槎到日邊
如此文章宜過海其中綽約信多仙
司勳最健言兵事宗憲先聞籌海篇
團扇家家詩萬首風流多被畫圖傳

奉贈仲張廣文步魏江原韻 餘姚沈文榮梅史

東泛滄波太乙船直道槎木斗牛邊
誰知勾漏山中叟來訪盧敖海上仙
蠻觸新書成戰紀源平遺事入詩篇
雞林賈客爭相問不讓香山萬古傳

賦贈張園老民 日本增田貢岳陽

叩轅獻策靖邊氛未見酬庸報夙勳
組練三千吳市甲背嵬五百岳家軍
避人常下南荒淚遯跡空瞻北闕雲
自古奇材

終有用偉人江表定推君

讀紫詮先生詩文集賦呈

日本吉田次郎

觀遍歐西典未休飄然又作海東遊飄時詩句擬諸將

大集中有

縣杜詩將五首

論勢文章洞五洲故國鶯花應入夢殊鄉風雨豈無

愁獻酬倡和新知足好醉江頭小酒樓

讀紫詮先生詩文遙寄一律

日本山本居敬

逸氣飄然事遠游滿腔才思湧江流詩過穠纖歸於淡文極
艱辛得自由渡海客來傳著述趙風人競覓賡酬操觚嘆老
世皆是惟有先生未白頭

寄贈紫詮先生次吉田次郎韻 日本牧田彥作

先生豪氣死難休幾度東西異境遊明月秋高懷遠浦蒸風

夏半夢香洲

詩人湖山以蜀川爲香洲

賦詩橫槊何多感把酒看天特破

愁笑我平居作牛後呼盃獨上庾家樓

聞紫詮先生西來賦此寄呈

日本秋永照隣

不擬蓬萊探藥船東航探勝賦詩篇山浮富士千年雪日湧
扶桑萬點烟詩境悲涼同島佛文才跌宕比坡仙元亭如許
停車訪欲結將來問字緣

卽席賦呈紫詮先生

日本石川鴻齋

驚見文星照海東才人遠近盡趨風公超到處門爲市孫綽
從來賦最工步詠花陰傾玉榼坐吟月下撫焦桐只看鳳鳥
翔千仞難縛中原結網中

宏名聶耳恰如雷何幸今朝共舉杯台嶽雲深仙客杳江城
日麗碧桃開衣冠夙謝三公貴草莽還占八斗才更羨胸中
富文史飄然駕鶴下蓬萊

席上呈弢園先生

日本狩野良知

逍遙海外作鵬遊足徧東西歷數洲意氣乘風濤萬里文章
經國業千秋功名不願記雲閣轍跡且期周地球猶有謫仙
絲未了何妨詩酒託風流

賦呈弢園先生卽以志別

日本中洲三島毅

孤帆千里抵雲天采藥來留蓬島邊江左賊由奇策定泰西
戰待鉅文傳交情不隔道猶古吟骨惟疑人是仙何事秋風
促歸去陽關一曲入離絃

聞紫詮先生將歸賦此寄呈

日本中村正直

飄然乘興日東遊才學如君乏匹儔筆役風雷多逸氣胸羅
星斗足奇謀久思對榻縱談未能肯命車來訪不那忍匆匆
分手去天涯好會再難求

卽席賦呈并送南歸

日本湖山長愿小野

幾度飛毫賦遠征大西洋又大東瀛却嗤霞客游踪窄最愛
雲臺學術精芳草綠波他日夢紅絃珠唱此時情也知新著
刻成近署否老夫賤姓名

席上呈紫詮先生兼送南行

日本巖谷修誠卿

光怪驚看太陸離泉源萬斛湧文思杯槃對酌猶新識肝膽
相投卽舊知品紫評紅溫尉什傷春惜別杜陵詩賤名喜入
柳州筆探勝晃山攜手時

聞紫詮先生將行寄呈

日本本多正訥

夙聞吳地有詞仙萬里遙浮徐福船早識文章關至性獨從
忠孝得真詮問奇誰識揚雄字獻策長留賈誼篇莫厭天涯
淹滯久相邀爭設主賓筵

奉贈天南遯叟

日本明鹽阪谷素

乘槎破浪走龍鼉想是東游逸興多自古奇才遭貝錦平生
至性託黎渦欽名欲下涪翁拜歷國時聞杜老歌丹酒如泉
澆塊壘伊丹產淹留且養碩人藎

席上賦呈紫詮先生

日本丸山鑽子堅

扇影衣香罨畫樓酒邊涼意暑初收縱橫詞筆貫天地磊落
胸襟凌斗牛羈客情懷逾杜牧新橋風物勝揚州流連只合
長今夕楊柳如春月似秋

翌日再呈重用前韻

日本丸山鑽龍川

高蹈常輕萬戶侯乘槎又作海東游媚山明水入吟眼闌雨
長風牽客愁夙讀著書神既往相逢傾蓋意先投他年我亦
西行客詩酒追隨君許不

席間賦呈紫詮先生

日本關根擬堂

天子呼來不上船句用乘槎萬里忽飄然囊中詩刻三千首海外名傳二十年餘事觀風仍紀俗高情攜妓又參禪揚州花月寥寥甚久待豪遊騎鶴仙

奉贈弢園先生卽送其歸粵 日本龜谷行省軒

人中之龍文中虎弢園先生卽同甫張膽明目論時機赤日
皦皦披雲觀粵賊凶燄滿乾坤激昂獻策叩轅門雄志未伸
賊未滅橫罹奇禍銜深冤一朝決策遊西歐長風萬里逐鵬
搏英雄割據尙未已虎視龍驤互相吞興亡古今幾感慨抽
筆窻前鬼哭喧歸來頭白不稱意飄然又到扶桑地聞說扶
桑有逸書欲搜小酉識奇字余亦東海一狂夫氣凌虹霓才
本迂讀書萬卷歸畫餅空餘傲骨老窮途相遇論交江樓夕

綠酒淋漓披肝鬲興來起舞蛟龍驚詩成金箋紅袖擘潑墨
直傾長江水揮劍擬鏌遙山碧忽聞驪調激秋風白雲慘澹
雁橫空一別萬里恨參商幾時追逐學雲龍君言丈夫一世
歎髀肉精神應注著述中嗚呼青紫紛紛不足論何如開拓
萬古之心胸

從神戶寄和弢園老民

古猷州吳廣霈瀚濤

仙雲冉冉集蓬山且向林花一解顏我愧東遊櫻世網君應
南去閉柴關高談落帽驚飛鳥急電穿樞機小斲煮酒英雄
今在否幾回懷古看刀環

天生名士紹風流世事無勞借箸籌避禍田橫猶島國談兵
杜牧自揚州驚心作客徂三載稽首求仙向十洲閑立高風
同拍手謝他肉食運奇謀

海頭遙指白虹生，灑酒勞君進一觥。
學劍漫愁無利器，攻詩直欲比長城。
王孫乞食渾無賴，阮籍狂歌太不平。
舉世滔滔誰與易，天教沮溺好同耕。

湖海元龍氣自豪，眼中今日見王韜。
論心不覺傾三雅，養勇何妨挫一毫。
醉臥有時懷管樂，笑談無語及蕭曹。
東方桃李君栽徧，贏得浮名北斗高。

贈紫詮先生

番禺梁肇晉少亭

西遊已倦倏東遊，遊遍瀛環大九州。
海上三山歸巨眼，天涯萬國數從頭。
不聞杜甫依嚴武，應有常何薦馬周。
無奈小儒多咋舌，五都羣詫夜光投。

寄呈紫詮先生以志景仰

嶺南王 騫月槎

鴻才自古出鴻儒，經濟文章曠世無。
雄辯天生王景略，妙詞

人美阮元瑜平生意氣空千載遠道烟波夢五湖羞向終南
超捷徑誰知抱負有明珠

花落閒庭草滿除間奇有客此停車匡時愧我空談策垂世
幾君獨著書望氣竟從三島外知音還在七絃餘東山不奪
蒼生願終見商霖展夙儲

余將北游津門席間賦呈弢園先生并以言別

日本曾根俊虎贈雲

去年聞君靖洲京詞壇遠近傳君名今年見君海國城綺筵
跌宕懷君情目光如電氣蓋世議論叱咤風雲生君言讀書
不得意頭顱如許無所成君昔壯遊萬里外西鄰冰海東蓬
瀛阿蘭觀日叩真宰扶桑濯足恢前程陂背三千秘文字胸
中十萬藏甲兵惟君襟懷多磊落攬轡壹志圖澄清方今歐

亞相並峙厥勢強弱難抗衡藩籬盡撤屏障失譬如大廈將
頽傾我思古昔益慷慨時欲呼天鳴不平中朝與我唇齒國
結好況是稱同盟一心併力足禦侮圓牆何暇爲門爭君之
所見與我合有如鸞鳳鳴同聲東來倉卒不久住高樓置酒
送我行檀槽急向當筵奏異方聞樂心怦怦我今別君請自
愛慎毋痛飲如長鯨北游燕趙多奇士屠沽意氣輕公卿彼
自悲歌我擊筑酒酣各自抒愚誠明年春風二三月萬楊柳
絲千花明我將與君再相會當須一飲三百觥更爲喚取雙
明娥親煩玉手彈瑤箏一曲旣終意未盡掛帆自此賦長征
君雖不遇慎勿疎隱居坐待天衢亨

小住香海感成四律奉贈

漢軍玉仲蘊 隣

山陬海澨記游蹤選勝搜奇見此翁拔劍一時同斫地高談

四座可生風，倘論豪氣應千古。誰向詞壇角兩雄？笑我悲歌同阮籍，猖狂端不爲途窮。

天涯執手一長吁，時局翻新異古初。仗節未能降，冒頓快心幾見襲。扶餘虛言桑景橫，磨劍實事南狐直。筆書

君所著書所載近事

大都實錄話到百端交集處，酒酣抵掌意躊躇。

紛紛海若忽揚塵，漆室燈昏太息頻。議論難爭秦典客，縱橫惟見魯行人。誦詩三百談何易，下筆千言倘有神。材不材間無位置，敢將蹤蹟感沉淪。

早知文字誤平生，楊意難逢眼未青。狂論敢緣知己發，罪言休使外人聽。沈酣典籍歸無用，舖啜糟醅悔獨醒。胡蝶夢周原爾爾，且隨海運徙南溟。

余時解之海雨

蘅華館詩錄總目

卷一

古今體詩一百四十八首

卷二

古今體詩一百三十一首

卷三

古今體詩八十一首

卷四

古今體詩七十九首

卷五

古今詩體一百三首

卷六 卷七 卷八 續出

右詩五卷都五百四十二首光緒庚辰五月下旬遯叟編次
既竟付之手民嗚呼余敢以此自信爲詩而竟欲問世哉惟
是三十餘年來境遇閱歷悉在於是展卷披吟髣髴可憶存
之聊足以見我性情云爾余行年五十有三矣日月逝於上
體貌衰於下文章未就事業無成遙望故鄉相隔萬里頭白
齒危未有歸期局促一隅疇與倡和親朋旣絕嗣續永無魂
魄一去同歸秋草以此思哀哀可知已是則因編此詩而淚
又不禁泫泫下也

蘅華館詩錄卷一

長洲王 韜 仲弢

不忘

欲從太上證靈修，不忘鴻泥此小留。
轉眼鶯花人似夢，當頭樓閣月如秋。
青山有約空埋骨，紅豆前生早種愁。
填海補天應亦易，相逢今世合休休。

無端風雨困黃昏，獨替花愁早閉門。
簾裏尙存新韻本，壺中已凝舊啼痕。
生無可樂何辭死，情尙難忘况受恩。
灑盡悲秋叢菊淚，荒江寂寞臥楓根。

玉色瑤情一瞬空，幾回呵壁叩幽穹。
簾前語不聞雙燕，地下書難寄隻鴻。
但有離魂來夢裏，徒懷同命各心中。
燈昏酒冷誰消遣，強起濡豪賦惱公。

惆悵詞成錦瑟篇。歌離弔夢總淒然。一生恨事空花月，半夜哀音迸管絃。莽莽寒煙埋宿草，茫茫逝水送華年。藥爐茗碗無聊日，合寫楞嚴懺悔先。

吳江徐仲寶至

去年人日君始來，草堂喜報梅花開。今年君至已晚矣，梅花如雪落江水。一度花開一度思，今年人非去年時。名場徵逐不得意，出口都成危苦辭。方今俗學工相皮，文字高寒識者稀。讀書豈徒弋科第，力古乃不救寒飢。吾黨徐生異庸衆，能出清聲懼羣鬪。祖孫父子皆妙才，詩名詎以隨園重。

謂君祖山民先

生飢驅飢驅，且出行書生意氣。輕公卿，朱門三重未敢通。甯質臯廡依吳中，吳中至此路尤近。片帆落手天，風引杞菊誰堪作。比鄰昔日名流今已盡，王微本不好詣人里居。寡懽跬

步窘我欲乘風作遠遊與君嘯傲凌滄洲

小飲青羅山館呈顧滌齋師

欲雪不雪天釀寒啾啾凍雀愁簷端地爐活火聊取煖一尊
入口僵頰歎新坼甕泥出餉客香浮色淡味獨完吾師不飲
好人飲尤喜脫畧禮數寬王郎本耻作小戶深盃不厭一吸
乾酒闌每易生感慨敢抒愚論披心肝伊昔操筆纔舞勺其
時我猶未識韓文章龐解蒙公許豈有羣書卓犖觀今日幸
備弟子列步趨敢曰升堂難中吳詩學久不振誰執牛耳雄
高壇金陵流派工簸蕩公其挽之排狂瀾佻淫積習冀一變
目笑羣兒肆擊彈靈芬秋水雖後起清新漸趨爲雕刊怪公
閉戶坐寂寞却來賣藥供朝餐再拜陳詞敬請益空仰邛坂
心愁歎

送徐仲寶之吳門時亦有錦溪之行

空堂相對難離思秉燭宵分聽漏遲今夜月光同領暑明朝
帆影各參差功名大有衰門感文字難期末俗知澁曲孤雲
吳苑樹憶君最是落花時

渡范遷湖

朝暾射窗喧雀聲久苦寒雨喜新晴舟子曉發叩門至持書
促我錦溪行錦溪此去只廿里風便掛帆頃刻耳春水連漪
溪漲平蕩漾持藻生空明小艇搖搖日未午大河前橫路若
阻煙深岸澗不見人獨聽空江響柔櫓此湖舊以鑿清名水
色澈底玻璃清或云范蠡遷家至此間湖濱卜築名遂傳當
年功就知機早一舸載得西施好屢散千金溷俗賈上士大
笑未聞道晚年想已厭網羅乃來此地娛烟波嗟予亦爲名

利縛何時歸釣隱邱壑

飲錦溪書舍示主人

吳淞十里錦溪頭天風送我扁舟遊主人築室邨之麓門前
新漲一江綠短草綠階青滿庭雜花映戶紅入櫺此齋地位
雖偏促安頓書倉亦已足仲宣乞食來此邦忝與主人羣紀
行主人爲具酒一石呼與鄰翁相對酌嗟我結廬淞水東年
來飄轉如飛蓬人生苦爲微名累不然種秫謀日醉但力耕
田閒讀書安辭長作農家居未知此樂何時有吾言不食如
此酒

遊里東僧寺

遙指寺門處蒼然夕照沈石堤故盤曲鐘閣極蕭森環水長
春草推窓驚暮禽地需幽僻好何必羨山深

小樹花初著殘僧著自煎林煙團處暝檐月墮來圓卽此幽
棲地居然八九椽結廬何日遂石瀨溜涓涓

錦溪僧寺讀墓碑偶作

錦溪本名陳墓俗傳宋南渡時陳妃瘞此故名今墓
在僧寺左旁斷碑嵌置壁間字跡漫漶幾不可讀然
大要一達官塚耳拾遺之廟小孤之山沿訛久矣不
足辨也

吾來錦溪柳已絲偶閒步履游叢祠高隄曲折石磴確其中
四面皆成池爲搜陳跡來相訪參差樹影江流濺簷前微雨
朝初晴湖中新水春來漲一角低迷林外煙歸然有冢峙其
間殘葉隔年猶未掃誰於此下酣長眠云是高宗昔避敵後
宮佳麗隨君側風塵憔悴陳妃子惺忪我髻髻病難起可憐不

得同輦行一朝簫管葬傾城我聞此語心未決五百年來驚
倏忽上天空見玉棺臨下世徒傳金盃出宿草紅心帶弱魂
半鈎冷月照黃昏明眸皓齒千秋劫寶鬘羅裙雙淚痕風飄
衣上桐絲落野棠自紅水自綠牆脚摩挲徑丈碑剔苔剝蘚
文堪讀字跡依稀辨未明約畧勸業言平生鬚眉致屈爲巾
幘向來顛倒從人情今人好色盡如此相沿絀繆何足耻回
首笑問南能僧始知耆老言無徵真娘墓上題詩慣蘇小墳
識西陵幻後賢憑弔徒紛紛明妃青冢何人見嗚呼帝王陵
寢且飄零惟此坏土獨得長共溪流清寺僧聆我論不辨微
爲鴈鵲噪屋角三兩聲但見落日山頭橫

坐愁不寐池月上窓靜中有覺紀之以詩

羅壁上新月竹徑團晚煙茶鎗水自沸藥鼎火宿然散髮坐
蘅華館詩錄

成夕涼風來衣邊燭滅生虛白幽人應未眠蟲聲窻隙透花影牆凹穿空庭寂無語此意誰爲傳

接家書後卻寄

一紙書來仔細看先看紙尾署平安春深猶有餘寒在路近何愁欲寄難小病無因偏止酒十行相訊勸加餐蠻箋燈下匆匆寫便數歸期半月寬

夜坐

安置詩筒併酒尊孰憐丐食滯江村瓦鉢沸聽茶聲急羅壁搖看燈燄昏花補籬間疎有影月斜屋角淡無痕故鄉舊侶應相憶重聚西窻與細論

偕同人泛舟吳門夜泊滄浪亭

放櫂吳淞口扁舟過野塘三人情自永卅里路偏長溪草隨

波綠籬花隔岸香倚檣無限意不覺暮雲蒼

約略水程盡猶從郭外盤山銜斜日下風急客衣寒學業慙
書劍音塵困鳳鸞所思不可見懷抱幾時寬

小泊滄浪側鄰船笑語聞聯詩多未竟中酒已微醺思爲離
鄉雜情偏與友殷昔賢曾此隱想像感遺文

燈炮更闌後紛然酒欲醒去家原未久此路亦頻經鄉夢如
雲住人聲隔水聽歲華空復逝慙愧鬢絲青

書所見

桃花門巷鎖葳蕤解識春風見一枝隔岸好山先露面照人
新月宛成眉驚鴻影斷迷來路覆鹿疑深繫去思不待重尋
已惆悵等閒吹白鬢邊絲

縱不相思亦可憐每羞憔悴在花前淡雲有影流如水殘夢

無痕化作煙明日天涯從此遠今宵燈畔未成眠姑蘇臺下
紅心草多恨多愁總夙緣

題畫蝶

夢魂栩栩繞階前苦戀春光祇自憐芳草王孫今已老落花
如雨雨如煙

初夏

柳絲踈地柳絲颺簾外桐花風送香春去亦如人易老事忙
偏覺日非長鷓鴣隔夜猶啼雨蛺蝶鄰家時過牆清簾生紋
涼似水且從睂髮一徜徉

錦溪寄懷詩四首

顧滌齋明經師

青羅館裏碧琅玕一片陰森六月寒曾否新詩鈔十手定知

好竹長三竿文章小技慙
翹籍衣鉢名山託柳韓
大藥駐顏容市隱十年高臥此袁安

楊醒逋茂才

身世悲涼感不禁哀音淒戾失巢禽
蜀都風月愁無際故國冰霜歷已深
更少衣從沽酒典祇餘詩爲送窮吟
東歸常下依人淚一臥江鄉百慮侵

徐仲寶秀才

繞里梨花三百樹閉門中有草堂幽
業承名父終傳世詩到才人例感秋
八月波濤飛白下一簾煙雨夢蘇州
鱸香領畧功名小搖落江鄉爾許愁

懷蘅閣內史

不是愁中便客中生憎勞燕各西東
才人例不登金榜仙子

應還住玉宮曲桁簾波看瑟瑟廻廊展點聽弓弓銀河咫尺
如天樣只有宵來綺夢通

夏日讀書迦陵精舍

復作歸歟想扁舟至里門蹉跎慙未補文字向雕論岸遠疑
無樹雲深若有村暮鴉斜照外帆影總昏昏

小築通幽處禪寮靜不嫌薺香風入牖蕉綠雨侵簾爲拓三
弓地能消九夏炎短椽容我借檢點置書籤

竹影碧團欒蕭然六月寒涼颺來戶牖落葉上闌干有約應
相踐無花可共看西風吹不歇窗外咽聲乾

伴石花偏好窺簷月又圓若能占五畝亦欲構三椽築室當
松下開門臨水邊圖書叢裏坐把酒意陶然

咫尺隣蕭寺高僧亦偶逢晝閒時隱几日暮又聞鐘窓竹鳴

秋急牆花弄影重簾紋如滑笏高臥正從容
煮茗初聽沸看棋偶遣忙桐陰當晝靜薤葉過風涼清坐情
偏適深宵話更長懽然團聚久此樂莫相忘

夜起

羅月淡掛壁夜深萬籟寂星稀看或無露重聽欲滴寒蛩啼
近人燈裏語唧唧秋士聞秋聲使我心中惻况復送遠風高
樓正吹笛

偕朱癸卿夜集青蘿山館明日將同發白下

屋山晨曉乾鵲啼故人有約來錦溪布帆無恙秋風快停舟
繫纜聞午雞忽地吾師折柬招相期剪燭娛深宵隔竹茶煙
清若水夾松月影冷於潮觸熱披襟當牖北牖邊樹影濃遮
屋疎疎小雨晚初晴娟娟淨綠涼微生迴憶疇悰亦已久可

知今會原非偶半載常似海情一口欲吸如淮酒酒盡更
闌話漸稀更添涼意上生衣牆陰欲歇寒蟲語簾裏忽見流
螢飛此時相對情獨絕天上星稀乍明滅簾角紋生衆竚寂
竹梢露重數聲滴今夕何夕共此堂明日之日官道旁白門
一片秦淮月又爲他鄉念故鄉

自滌關至丹徒舟中所得絕句

曉關十里散涼煙尙見星光照水邊岸上露蛩啼不歇樹痕
濃護佛祠前

行經南望亭邊路高岸廻潮曉夜渾却羨數家茅屋好隔籬
竹裏自開門

獵獵船旗颭遠風黃茅蓋屋土成墉一堤烟柳橫林近正好
泊舟聞暮鐘

丹陽城外暫停橈
雨過山痕淡欲消
苦憶新豐佳釀熟
隔溪村店一帘飄

雲氣半江涼
欲雨水痕兩岸暝
成烟舟行要識秋來處
盡在蘆花楓葉邊

板牀竹簟夢難成
底事秋天未肯明
愁思連朝偏爲酒聊拈
詩景破鄉情

夜行

夜來微雨斷燈影
出孤齋歷亂墮流螢
扁舟過兩岸

小泊七里江

繫纜平橋晚楓林正落暉
榜人閒倚櫂水氣暗侵衣
圓月翻波碎孤雲待族飛
遙看煙樹外漸覺過帆稀

舟膠新河中乞潮伍相國

繫舟樹下等潮開再拜靈胥奠酒杯江岸濤聲成險壑吳宮
草色上荒臺千帆迎水鳥檣集一線衝波白馬來淹滯征途
向誰告急投詩句敢相催

黎明渡江卽事

一片喧呶客夢驚篙師解纜促舟行依微岸遠秋無際浩蕩
潮來夜有聲殘月不明猶掛樹布帆無恙更催程曉烟欲散
啼鴉起好景濛濛畫未成

風雨聲如萬騎連奔龍澎湃挾危舷河山自古分南北波浪
無邊接地天出沒江豚夜吹霧翻騰水怪曉飛涎好將枚叔
吟秋筆寫出觀濤賦一篇

夜泊白下水西門

帆檣羣赴水西門遠寺鳴鐘晝已昏六代江山餘霸業千年

草木入燒痕遙憐北固分秋色莫話南朝愴客魂兩岸歸鴉
寒意重篷窓風雨與誰論

剪燈相對兩茫然約畧行程問長年三日渡江風絕險終宵
傍岸雨如懸隔船人語聽偏寂到枕潮聲攪不眠準備輕舸
湖上去莫愁渡口問前緣

至寓齋作

事業前朝付劫灰秣陵王氣亦堪哀過江詩爲悲秋作捫石
人誰訪古來室借三弓閒憩足酒須一石客懷開釣魚巷側
秦淮畔應有簫聲到鳳臺

秋來芳草遍閒庭一桁疎簾六扇屏牆缺正當殘樹碧屋低
不礙遠山青疎花入夜窓無影涼月著人醒未醒剪燭更闌
渾欲寐那堪舊事話零星

欲寄

尙憶前番握手時
未行先欲問歸期
最憐離別牽紅袖
反怨功名鎖翠眉
乘月輕帆偏獵獵
和烟衰柳尙絲絲
金錢長夜休頻卜
爲有檀郎絕妙辭

新寒幾日襲簾幃
旅思紛然願總違
劣有心情連日醉
祇餘魂夢昨宵歸
夜深愁聽百蟲語
月落驚聞獨鴈飛
只恐夜涼花下坐
露香風警透羅衣

疏簾隔斷一溪煙
叢鬢長眉絕可憐
碧玉工愁偏此日
泥金寫帖是何年
詩題桐葉人雙笑
被冷蘆花客獨眠
細雨黃昏無奈甚
殘燈明滅短窓邊

過伍相國祠

伏劍竟身死
夫差豈霸才
恩仇何所見
忠孝半成灰
秋至潮

聲壯春深鳥語哀
胥江祇尺土荒草上蘇臺

過古廟

金粉荒涼舊事非
深林不見鷓鴣飛
尙留斷碣苔侵石
惟有長松葉墮衣
隔岸寒雲殘照暝
閉門疏雨過人稀
前朝興廢從何問
遙見牧童烟裏歸

白下雜詩

皆寓齋紀遊之作
策蹇之辰拏舟之日
偶有所歷輒錄於篇

年年簫管泣秋風
丁字簾前燕影空
偶見隔湖小兒女
髻花簪得可憐紅

秦淮韻事半成煙
人影衣香爲惘然
我是年來銷綺夢
忍彈舊曲聽么絃

薄陰遊女晚來稀
妙相菴邊樹四圍
隔著垂楊剛見得
不知微雨濕秋衣

莫愁湖畔豈無愁
水閣珠櫺盡下鉤
郎自乘船妾鼓櫂
緣何此水慣分流

我到隨園日已昏
從前壇坫渺無存
風流雲散難追憶
月掛烟蘿微有痕

裙屐清游久寂寥
秋墳詩鬼暗魂銷
絲絲弱柳疏疏月
盡把興亡付去潮

景陽宮殿久成空
豐草蒙茸臥巨鐘
井底寒泉流不歇
但聽四野亂啼蛩

秋水文波碧似羅
吳儂船上聽吳歌
誰家燈火簾櫳遠
纔到鐘鳴月滿河

遇雨將歛巾一角衝泥幾悞路三叉
清涼山下四圍碧盡日騎驢自看花

鴉帶寒雲入遠村荒祠斜日淡秋痕
滿山黃葉落如雨愁聽疏鐘白下門

秦淮卽事

來遊最好晚晴天約上秦淮泛畫船
十里鶯花供跌宕兩河簫管艷神仙
消除豪氣惟詩裏飭醜情懷到酒邊
兒女英雄皆本色惜將絲竹遣中年

綠酒銀燈水上樓湘簾不捲最宜秋
怕聞折柳桓伊笛誰識迎桃子敬舟
浩蕩波光銷客恨朦朧月影替花愁
隔湖絃索殷勤弄觸撥柔腸不自由

淡煙輕粉事荒涼尙憶風流說頓楊
南渡笙歌成好尙東皇

花月寫文章何來畫鷁衝波遠幾見驚鴻隔浦翔只有簾前
雙燕子年年此處度秋光

暮煙漸淡細波生檻外嵐光畫不成雙槳人來曾有約六朝
山好半無名銷磨年髣綠多病蕭瑟秋風未放晴纔見湖邊
簾盡下衫痕黛影自分明

留別秦淮

到此日無幾別時情自生潮痕常過岸樹影半圍城水碧留
人住山青送我行蒼煙斜照裏願與爾同盟
放櫂從茲別垂楊綰客舟煙波如有意鷗鷺不勝愁殘月初
醒夢寒花欲殿秋所思渺無際相約待重遊

夜坐

此夕風寒酒易醒銀屏時見墮流螢隔窗燈影涼於水長夜

無人月到庭

反遊仙詩并序

顧滌蠶師嘗作反遊仙詩大旨謂殢霞餌玉通人寓言不如積碩學爲世用僕本無心仕進讀吾師詩悚然久之自念秉才既弱輒遭擯斥蓬萊清淺渺若登天設使浮榮有耀而此中已搖則平日所以自勵者安在也至遁跡山林或可藏拙亦心鄙之矣因亦作反遊仙詩以見志仍用郭景純原韻

鷦鷯林樾巢鸞鳳枳棘棲不見古達人奮跡起草萊

叶

長生

亦有盡安事擬仙冀抗心太虛表躡足青雲梯箴規莊惠友
黽勉黔梁妻操守苟不堅局促決藩羝置身固何若當與冥鴻齊

靈秀在天壤燕齊有奇士著書宇宙間邁迹雲霄裏羞識黃
石公肯隨赤松子謂彼終南山仕宦捷徑耳風流久不作乘
時當崛起屈膝求寵榮紛紛何足齒南面擁百城點筆任驅
使

草木托興微春花何娟鮮避世者誰子藏拙處深山

仙叶

何不

勵志節易轍而改絃食必炊仁粟飲必酌廉泉榮華與彫枯
轉睫皆雲煙學問存其人道德誰仔肩士貴希聖哲緬懷千
百年

清操可長存浮榮知易謝蟲鳥變春秋裘葛思冬夏蓬島至
蒼茫桑田徵變化西笑向長安願言稅我駕獻策既不遇且
自安茅舍窮則善其身何事徒悲叱

朝市亦可隱杖策思獨遊貧賤洵堪恥將泛皇都舟豈敢躁

自進金馬門可投松柏勁寒歲枇杷翠晚秋滔滔斯世人嘆惜誰清流

文字固憎命詩書能爲災此中貴自適咫尺皆蓬萊泉石不可託奮步翔瀛臺願預鎬洛宴隨流飲瓊杯典策獻天子妙語解人頤叶一旦置通顯英名擅八垓豈食不死藥年老亦反孩管樂志有在終非百里才

鉛汞即可燒迂誕奪其魄朱顏已非故元髮倏變白勲業不早建零落隨蘿柏陳篋發殘書青編展日夕至理挾精微羣言盡瀝液偉績著旂常豐功垂金石俯仰天地中皆爲寓居客

秋月

悄剔銀缸結繡腸秋風吹墮十分涼水晶簾薄光難隔翡翠

樓空夜正長四野無聲寒玉笛半欄斜影倚紅妝離悰別緒
情偏遠但祝團圓願早償

不寐

烟羅四敞風入羃湘簾半捲月掛壁不寐披衣夜深起側聽
空階殘露滴

簾

怕有風時垂密密更無人處護重重日長已是少情思睡起
微聞花氣濃

錦溪詩社小集席次呈陳松濤孝廉

建豎壇坫伊誰功拔幟立幟詞中雄我來妄擊雷門鼓森嚴
壁壘偏師攻席上更逢驕叔夜

狂俊西冷
才性寒傲

世間孰識狂次

公處仲唾壺敲欲缺抑塞磊落抒心胸無才我自愧刻鵠人

言此老其猶龍屈服張華走成式解經不窮戴侍中邇年我
亦懷述作揚雲小技嗤雕蟲快讀奇書固所願敢誇健筆無
不工石鈔水沸春茗碧羅壁影搖燈燭紅人生如此致足樂
何必食粟千萬鍾

冬夕

蕭蕭牆外竹聲乾霜重樓高夢亦寒人在西風正惆悵又吹
落葉上闌干

夜起

夜闌夢醒人初去起窺窓戶疑何處高樹風寒鳥欲啼空牆
月墮天將曙

無題

連日輕陰不下樓花叢雨過濕簾鉤隔簾蝴蝶雙雙見剛觸

儂心舊日愁

舊時庭樹尙依然小別無端已一年記得扁舟湖上過岸花落盡雨如煙

樓臺寂寂雨浪浪到此離愁總斷腸相見千回皆夢裏醒聽落葉走迴廊

剪剪西風透碧帷近來消息斷聞知不堪又到黃昏後纔上銀燈客去時

門前絲柳帶寒痕往事辛酸欲斷魂無計著書且閉戶藥爐經卷度朝昏

入春寒甚多雨

自入春難十日晴連朝愁聽鷓鴣聲沈沈雨疏還密夜澹澹燈昏復明江上雲猶如絮厚門前水又逐潮生小庭花事

拚無著要乞天公不世情

一舸

惻惻輕寒淅淅流又從一舸到江頭鴛鴦並世難同命蝴蝶
前生幻宿愁若問桃花原未嫁漫猜芍藥定相留青衫淚點
紅箋字此願難償分已休

偶言小別蹙雙蛾只爲情深怨亦多隔岸鐘聲驚短夢題裙
詩句托微波鳳鸞消息常飄泊蘭絮因緣慣折磨簾外流雲
時作暝薄寒猶著一重羅

春來百感正茫茫又著離愁更斷腸伴我寒燈昏似墨照人
殘月冷于霜夢爲離別都成淚魂入溫柔別有鄉作繭紅蠶
多自縛宵闌再拜炷心香

紙閣蘆簾已有人偏能偕隱不嫌貧明粧謝艷羞花比翠袖

生寒倚竹頻悔我多情徒自苦憐渠小病豈無因篋中猶剩
羅巾在願寫心詞禮玉真

蝶

如雨如煙夢裏花卽非夢裏亦天涯文章金粉終何用身世
飄零空自嗟萬里家山春已老一生風月念多差癡魂休戀
塔前地咫尺簾櫳一半遮

夢至青蘿山館

犖确行來石徑微細尋舊路未全非依然窻戶遮三面記得
琅玕碧四圍粉壁淋漓留醉墨天風料峭上寒衣黃昏小院
偏閑寂澹月如絲照故帷

聚花簾外落桐花春晚光陰感物華絕代嬋娟隱空谷一門

詞賦盡名家

歷英女
士工詩

樓臺楊柳青如畫庭院芭蕉綠上紗尙

記讀書臺畔坐金經一卷誦楞伽

春去

溫風闌雨信全非怕見春從客裏歸
流水無情空采采啼鶯有恨故飛飛
棠梨舊館誰爲主花月新詞唱亦稀
便是重來時已換玉樓人老綠陰肥

鹿城歸櫂口占

夾岸微風解纜時平橋小雨落帆遲
馬鞍山色渾如舊每到來游例有詩

自花朝後至錦溪春杪未歸寄醒廵三十韻

寂寞錦溪路蕭條淝浦濱遠山青鬢鬢淺水碧粼粼
橐筆情無限檢書願未真交遊長契闊世事劇艱辛
地僻賓朋少邨深風俗醇庭花看盡放檐雀喜能馴
檢點詩篇富登臨景物

新樓臺常倒影魚鳥自親人入饌思肥鰕穿波采嫩蔬宵闌
搜舊帙酒醒憶前塵覓往將三月相思又五旬飄零今已慣
書札寄來頻弱弟能勘讀山妻不厭貧簾櫳梳髻好楊柳學
眉顰同有飄樓意且看現在身文名窮亦損友誼久彌親徒
抱尊前感彌傷別後神屋邊叢樹暗江上暮雲屯我志甘沈
晦君才善屈伸歌詞煥曹植筆墨壓陳遵小飲攜蠻榼相逢
岸角巾丰標誠謬謬氣象亦閭閻夢裏空千里雨中過一春
短窓燈火闌深巷犬聲猶尙未能逃俗會將遂卜鄰偶耕何
足道偕隱豈無因却病教丸藥謀生愧負薪芳時憐骭體古
道歎沈淪池草碧於黛野薺白似銀嗟予處幽僻往事爲君
陳

初夏齋居卽事

一春掩衡茅芳華倏已謝及此櫻筍時行廚會須借了却數
徒課偏得半日暇簾外竹蒼翠簷前花姹姪錢杖頭解濁
酒鄰家貰聊持此一杯以餞東皇駕嘆息節物移歲月許我
假芍藥紅上闌薔薇開滿架行樂當及時秉燭娛良夜感此
意踟躕獨坐短窻下

前夜雨瀟瀟春去苦不知芍藥開何晚石闌紅一枝雨中色
更媚折供古軍持曉起忽相見頓減昨日姿因其已萎後想
其方開時榮悴固不久遲暮深足悲物當葆厥真以全賦畀
資一爲耳目玩遂致失所宜况乎春始來物物若有私轉眼
綠陰濃枝榦嗟離披人生亦若是感慨以係之秉質當自強
莫被東風吹

去年立夏早今歲作詩少爲惜時光過偏多塵事擾館中童

兩三垂髻皆幼小吾媿爲人師誘以理易曉日月去堂堂江
波隔渺渺懸想我高堂夢魂時相繞傍牖雜花妍入簾殘月
皎醒來簷雀鳴茶爐烟嫋嫋

入夏方數日天氣已驟熱黃昏雨忽來瓦上聲淅淅輕雷若
有怒電光乍明滅夜深風更狂欲把庭花折芭蕉葉多捲箬
簷痕應沒曲港與溪通池蛙鳴不歇聽之不成寐益覺客懷
劣料知同夢人擁髻亦淒絕

夏夕不寐口占

永夕不成寐懷人最可憐簾鉤微有月清影到牀前

家大人客申江有感

接得申江一紙書故鄉米貴信難居但能飽喫殘年飯自可
安休半畝廬羈裏寒螿還四割篋中故物任三祛

余家三馬
偷兒所苦

硯田無恙書倉富跂脚科頭好自如

清閒我只羨農家秋至籬邊開豆花近世授經輕馬氏年來
問字少侯芭常懷短刺羞彈鋏擬買良田學種瓜便作邨夫
子亦好那堪帆影又天涯

渡鑾清河遇雨

逢秋歷夏此徘徊又遭扁舟載我回驀地日光遮不見漫天
雲氣鬱離開狂風忽起欲搖樹急雨未來先有雷且看跳珠
入船裏天公似把好詩催

暫向垂楊繫小纜黑雲堆墨壓篷窓水光激蕩將吞岸雨氣
迷漫欲滿江瞥見來帆如過鳥漸聞隔樹有鳴龍吳兒解水
偏多事水調新謳未貼腔

初秋

微風拂拂過池塘水。初紅菊未黃。嫩婦種花翻舊帙。呼僮曬藥。檢奚囊。窓前隨意開三徑。竹下偏宜置一牀。茶盞甚簡。渾細事已堪斷送半生忙。

漸驚疏鬢。秋光一葉空庭。寶井牀。跣脚看書燈可近。科頭啼髮日猶長。宵闌聲寂知蟲苦。飯罷吟成思酒香。羞覺簾紋渾似水。天公一味作新涼。

閒夢蘅病

無端薄病便添愁。骯髒情懷不自由。簾外有聲頻側耳。窓前小坐自梳頭。卽看髩影蕭疎甚。還耐秋風料峭不。勸汝裝綿須及早。新寒昨夜襲粧樓。

已是愁中復病中。起還無力臥偏慵。怕臨鏡。慙眉痕淡。教下簾鉤。樹影濃。薄被初熏時有夢。長宵微倦忽聞鐘。請看羅袖。

寒如此懊惱年來帶更鬆

感遇

空谷有幽蘭其品軼芳杜非無高尙心徒與衆草伍孤萼孕
寒香柔根託淺土從未知媚人亦非生當戶竟以見嫉鋤奇
冤抱千古見之三歎息瑤琴獨自撫

鸞鳳翔天末不與雞鶩爭梓枏生山中不共桃李榮操守良
獨異識見殊羣情豈其溺名利而與禍患櫻浮華固不久要
共歲寒盟惟以妒者衆謠詠始叢生材大乃被棄品高終見
輕既不爲世用當自葆厥貞

除夕讌集天風草堂謹同滌齋師韻是日立春風雪寒
甚

檐牙冰乳滴殘年銀燭燒來照綺筵柏葉杯中春似海梅花

帳裏夢如煙更闌正是談心候歲暮猶虛繞膝前

時兼大人客海上

之申江途中作

欸乃從茲去人烟渡口迷近村犬聲猛澗岸水痕齊舟小趁潮上帆孤向日低一尊成薄醉有客歎羈棲

春日滬上感事

海上潮聲日夜流浮雲廢壘古今愁重洋門戶關全局萬頃風濤接上游浩蕩東南開互市轉輸西北供徵求朝廷自爲蒼生計竟出和戎第一籌

蒼茫水國帶春寒鯨鱷消餘宴海瀾閭里共欣兵氣靜江山始歎霸才難殷憂漆室何時已慟哭伊川此見端遠近帆檣賈胡集一城斗大枕奔湍

烽火當年話劫灰金銀氣溢便爲災中朝魏絳紆謨畫窮海
樓蘭積戢猜但出羈縻原下策能肩憂患始真才于今籌國
詎容誤爛額焦頭總可哀

海疆患氣未全舒此後豈能防守疏應有重臣膺管鑰早來
絕域會舟車土風誰補蠻夷志波畢今登貨殖誓千萬漏卮
何日塞空談國計急邊儲

自申江返里門

一水碧無際扣舷正苦吟邨多到家近樹雜隱雲深遙岸見
山色夕陽驚客心昨宵歸夢裏野寺斷橋尋

懷吳江徐仲寶

簾幕愔愔地燈光淡淡時故人成久別百里亦相思多病惟
綠酒遺愁底是詩梨花寒不落春雨夢徐熙

塵迹原如夢歡踪不可期著書徒覆瓿閉戶且傾卮春草繞
江路疏花出短籬宵深坐簾底寒上髻邊絲

春日茗香寮雜詩

紅護窻櫺綠護扉薄陰庭院落花飛長卿善病風懷減小杜
工愁髻髮稀銀燭燒殘聽夜雨金釵典盡到春衣醺醺淺白
薜蘿碧一櫟春光總覺非

飄零身世感人天不識離憂不受憐泡影幻成名士夢鏡花
叅破美人禪酒懷跌宕思前事詩筆叢殘入舊年開到鼠姑
春已盡嫩寒尙帶袂衣邊

筆床安置近書牀茶竈輕煙風自颺簾底有人閒擁髻畫長
無事靜焚香花扶屐齒紅迷路雨濕苔衣綠上牆怕說神仙
多小劫幾回蹀躞繞迴廊

縱有離魂何處尋銀燈淡淡夜沈沈抱來碧海青天恨同此
千秋萬古心生不並時安閒死昔猶難見況而今他年隔世
終虛願只恨情深緣未深

楊丈楚躬自蜀歸賦呈

萬行雲樹萬煙巒鵲鵲聲中君正還五六年愁多似葉八千
里夢亂千山途窮悔作諸侯客境厄能凋壯士顏珍重尊前
始團聚夜深剪燭話廻環

詠繡毬花次許玉筍韻

素面嬋娟怯嫩寒聚花成雪護闌干未圓明月慙相照不散
春風併作團巧構樓臺瓊錦簇閒飛蹴鞠玉塵乾天工別具
玲瓏手剪出紗羅一例看

落花次許玉筍韻

罷却千秋會閒庭滿落花深深荒徑濕寂寂院門遮低襯鞋
尖鳳飛粘鬢底鴉前因渾似夢和雨撲窓紗

穀雨日於滌蠶師家看牡丹用羅昭諫韻

早起巡闌問夙因東風一例作深春
廿番芳訊浮沉夢四月輕寒料峭人
開到名花濃似海曉來微雨細于塵
絳帷別有閒風趣珍重尊前現在身

深鎖

深鎖歲華隔幾重淚痕已凝枕香濃
見偏掩歛如神合日尙猜疑况夜逢
照檻月留前度影隔帷燈瘦舊時容
芙蓉顚顚蘼蕪死搖落秋風奈箇儂

鹿城應試夜泊城外

秋風秋雨過危橋水上寒燈獨客撓
舊事渾如春去鴈新愁

多似暮來潮舟人不語眠篷底殘月無聲墮柳梢自是名心
猶未淡明年相約看金焦

鹿城旅邸夜作

銀壺漏漸不聞聲四角秋紗八尺茵偏覺寂時蟲語苦偶然
涼處簾紋新還家夢短憐無迹滿地月明疑有人回首墜歡
渺難拾半爲烟影半爲塵

遊玉峰

約伴同攜濟勝具褰衣共上玉峰山山中寺剝荒涼甚芥壁
新詩尙未刪
容易登山復下山迴頭拄笏看烟巖山靈也解留人意一路
嵐光送我還

讀曲歌二首

願爲蝴蝶髒勿作鴛鴦帶髒貼郎身邊帶繫郎腰外
樹下見郎來拋个青梅子郎莫嫌梅酸妾心亦如此

滌蠢師招賞牡丹先之以詩

剪風絲雨嫩晴天疏鬢輕颺藥竈烟猶戀殘春悲晚晚肯因
小病負嬋娟已知此日非前日漫說今年勝去年昨夜挑燈
眠不著自題幽怨寫紅箋

暫捲湘簾已惘然更揩啼眼對娟娟鼠姑半宿闌邊雨鳩婦
猶迷柳外煙濃酒比春容易醉好詩如夢不成篇朝來偏作
閑工課手校羣芳譜一篇

小窻鳥語惱人眠鎮日思君倍可憐如影如塵些子事不晴
不雨奈何天好花安用名香蕪苦茗偏宜活火煎咫尺仙源
倘招隱未應索我買山錢

宴後呈滌蠶師

天爲名花暫放晴
潑醅時節過清明
愁無今古消難盡
酒爲嬋娟醉有名
蒔竹焙茶宜我輩
讀書識字見平生
昨宵簾影燈光裏
不厭深杯一笑傾

翻因病齒強爲歡
旣怕甜時又厭酸
已分花前拚蕉萃
不妨窓底坐團圞
沈沈庭院沈沈夜
薄薄簾櫳薄薄寒
料峭衣邊風未止
起携燈照小闌干

春草

簾幙無心春滿庭
燒痕蘇後草青青
客袍歲歲慙相似
蠟屐年年向此經
和雨和煙南北路
半花半柳短長亭
勸君莫問前朝事
隋苑吳宮夢未醒

此生

六扇窻櫺一桁簾碧紗
櫺外嫩寒添無憑無據
蛇醫褪疑喜
疑嘆燕語尖剛好別時
花淡淡最相憐處月纖
纖此生已了他生未懶
把香奩玉鏡占

紀夢

不知絮果與蘭因
簾冷紅粧鈎冷銀月缺
花殘惟有恨酒闌
燈炮更無人明明記得
終成幻夜夜能來或是
真莫打黃鶯
莫嘆燕珊瑚枕上淚痕
新